

DILO TSE DI NENG DI SE

JALO GO TSWA TSHIMOLOGONG

¶ . . . mo metlheng ya Gagwe, ba ruta dilo tse di neng di se jalo. Ke a itlhoma fa A ne a ka tla gompieno, O ne a tlaa fitlhela selo se se tshwanang: dilo tse di neng di se jalo go tswa tshimologong. Fa o tlhola o batla go itse se e leng boammaaruri, boela ko tshimologong. Boela ko Genesi, mme o ka tsaya tumelwana nngwe le nngwe le boammaaruri bongwe le bongwe go tlogeng gompieno. Fela . . . Dimela tsotlhe di simolola ko Genesi, ka gore Genesi ke kgaolo ya peo ya Baebele. Mme fa re batla go itse se se nepagetseng, re boele morago kwa tshimologong.

² Fela jaaka ke ne ke leka go bua bosigong jwa maabane, fa Modimo gangwe a bua polelo, ga A kitla a kgona go farologana le polelo eo. O tshwanetse a e tshegetse go ralala tsela yotlhe. Se A se buileng ko Genesi ke selo se se tshwanang mo go Tshenolo, le tsela yotlhe go ralala. Ena ke Modimo, mme moo ke gotlhe. Lo a bona? Mme Mafoko otlhe a Gagwe ke nnete.

³ Jaanong, re fitlhela gore fa Jesu a ne a tla, O ne a fitlhela baruti ba ba neng ba tsere Lefoko la Modimo mme ba Le sokamisitse, go ikgotsofatsa. Ba ne ba tsere ditaolo tsa Modimo mme ba Le sokamisetsa ka mo thutong ya kereke.

⁴ Jaanong, gakologelwang, go na le Motlhodi a le mongwe fela, mme gotlhe . . . Satane ga se motlhodi. *Boleo* ke eng? *Boleo* ke “tshiamololo,” mme *tshiamololo* ke “tshiamo e sokamisitswe.”

⁵ Gongwe ke tlaa go dira gore go tlhaloganyege go feta. Bona ba . . . Lo phuthego e e tlhakaneng. O reetse ngaka ya gago; ke mokaulengwe wa gago. Gore monna a tshele le mosadi wa gagwe ke tshiamo. Ena o nyalane nae. Tiro e e tshwanang le mosadi yo mongwe ke loso. Nngwe e tlisa botshelo, e nngwe ke loso. Lo a bona? *Tshiamololo* ke “tshiamo e sokamisitswe.” *Leaka* ke eng? Ke “boammaaruri bo fapostswe ka phosego.”

⁶ Jalo he seo ke se Jesu a se fitlhetseng. Mme se botlhe ba rona re tlaa tsenang mo go sone, fa fela re tsaya re bo re oketsa, kgotsa re ntsha mo Lefokong la Modimo, ke go sokamisa Lefoko la Modimo.

⁷ Jalo he erile Jesu a ne a tla, O ne a fitlhela gore ba tsere Lefoko la Modimo mme ba Le sokamisa, ebile ba dirile ngwao ya motho. Mme O ne a re, “Goreng lona ka ya lona ngwa- . . . lo fetola Lefoko la Modimo?” Ka go tsaya dingwao tsa bone, mme ba fetola Lefoko la Modimo, ba Le dira le bue sengwe se ka mmannete Le neng le sa se bue.

⁸ Re fitlhela gore O fitlhets seo mo motlheng wa Gagwe, mme O tlaa se fitlhela fano gompieno. Mme Ena, mo Bolengtengeng, kgotsa, mo Sebelebeleng sa Mowa o o Boitshepo, Modimo yo o tshwanang yo o tlhotseng a ntse a le gone, a agile mo bathong ba Gagwe mo popegong ya Mowa o o Boitshepo, gone go supa ka modumedi wa nnete, gore motho o sokamisa Lefoko la Modimo go nyalana le thuto ya bone ya kereke, mo boemong jwa go dira gore tumelo ya bone ya kereke e nyalane le Lefoko la Modimo.

⁹ Ke batla mongwe a batle Tumelo ya Baapostolo ya kereke mo Baebeleng, jaaka re tlaa go bua gompieno, “Ke dumela mo kerekeng ya Khatholike ya Roma e Boitshepo, kabalano ya baitshepi.” Sengwe le sengwe se se abalanang le baswi ke go bua le mewa ya baswi. “Go na le Motserganyi a le mongwe fela magareng ga Modimo le batho, Monna Keresete Jesu.” Ke gotlhe. Ga go na motsereganyi yo mongwe. Jalo he sengwe le sengwe. . . Ba sokamisa dilo, ba dira Tumelo ya Baapostolo ya kereke.

¹⁰ Fa moapostolo a ne a na le tumelo epe ya kereke, e ne e le Ditiro 2:38. O—o ne a na le . . . seo ke se ba neng ba se rera ka malatsi otlhe mme—mme ba se kokotelela ka mo bathong. Ba tshwanetse ba nne le boikwatlhao ko go Modimo le jalo jalo. Ke gore, fa go na le tumelo epe ya kereke mo Baebeleng, eo e tlaa bo e le yone, e baapostolo ba e dirisitseng.

¹¹ Jalo he bone . . . diketelelo pele tsotlhe tsa bone tsa Mowa o o Boitshepo di ne tsa nna le Lefoko. Mme fa motho ope, kgotsa moengele, a ka ba a bua sengwe se se leng kganetsanyong le Lefoko, Bagalatia 1:8 ne ya re, “A ena a hutsege.” E tshwanetse e nne Lefoko la Modimo.

¹² Paulo ne a re, “Fa moengele go tswa Legodimong a tla ko go lona ka efangedi epe e sele go na le eo e lo setseng lo e utlwile, a ena a hutsege.” Jalo he re dumela gore magodimo le lefatshe di tlaa feta, fela Lefoko la Modimo ga le kitla le nyelela, ka gore Lefoko ke Modimo. Modimo ga a kake a nyelela. Lobopo lo tlaa nyelela, fela Modimo ga a kake a nyelela.

¹³ Ga se lefelo lepe la metlae, felo ga therelo ga se lefelo la metlae. Ke akanya gore Lefoko la Modimo le tshwanetse le reriwé go tswa fano ka masisi a pe—a pelo, mme re tshwanetse re go gakologelwe. Fela go bua seo fela, go dira ntlha ena, motho wa kgale yo montsho, golo gongwe fano fa Borwa, nako nngwe o ne a go dira polelo, ne a re, “Ena go botoka a bo a eme mo Lefokong la Modimo go na le go ema ko Legodimong.” Ba ne ba mmotsa gore gobaneng. O ne a re, “Ka gore tsoopedi Legodimo le lefatshe di tlaa nyelela, fela Lefoko la Modimo ga le kitla.” Go jalo. Re tshwanetse re nne mo Lefokong.

¹⁴ Jesu, fa A ne a tla, O ne a re, “Moše ka ntlha ya gore bothata jwa pelo ya lona o ne a lo lettelella tlhalano le mosadi wa lone: fela go ne go se jalo go tswa tshimologong.” Jaanong, re fitlhela

gore ba ne ba tsere ditaolo tsa Modimo mme ba di dira gore di se nne le mosola ope.

¹⁵ Erile Jesu a ne a tla, O ne a fitlhela batho ba soloftese mo kerekeng go bona poloko. Ba ne ba bona eng? Ditumelo tsa kereke; lekoko lengwe le lengwe le dira thuto ya lone ya kereke. Mme fong seo ke se A neng a fitlhela batho ba ikaega mo kerekeng ba direla pholoso; mme ba ne ba fitlhela ditumelo tsa kereke tse di dirilweng ke motho.

¹⁶ Mme fa A tla gompieno ka Sebele mme a bua le rona, O ne a tlaa fitlhela selo se se tshwanang: motho a dira gore Lefoko la Modimo le nyalane le lekoko la bone, a ba naya ditumelo tsa kereke. Mme ga go na poloko mo tumelong ya kereke, fa e se Baebele. E tshwanetse e nne Baebele, ka gore Lefoko la Gagwe ke . . . gotlhe mo re nang le letlhoko la gone, ke Lefoko la Gagwe. Mme Lefoko la Gagwe, fa A le Lefoko, Lefoko la Modimo ke Modimo. Ke gotlhe. Ke Lefoko la Gagwe, Boene. Ena o . . . “Ko tshimologong go ne go le Lefoko, mme Lefoko le ne le na le Modimo, mme Lefoko e ne e le Modimo.” Mme Lefoko e santse e le Modimo. Le santse e le Modimo.

¹⁷ Jaanong, re fitlhela gore fa A tla, O ne a fitlhela banna, fong, ba tsaya ditaolo tsa Modimo mme ba di dira gore di se nne le thuso epe, ka go tsaya ditaelo tsa Modimo, mme ba di fetofetola go tshwanela ditumelo tsa bone tsa kereke, jalo he go ne go sena mosola ope. Mme kereke e ne ya leba . . . Batho ba ne ba leba ko kerekeng mo boemong jwa go leba ko Lefokong la Modimo. Jalo he ka moo, O ne a re, “Go ne go se jalo go tswa tshimologong.”

¹⁸ Re go fitlhela go tshwana gompieno, jaaka ke setse ke inotse gabedi kgotsa gararo mosong ono, mme ke lebile tshupanako eo, e ntira mafafa, jalo he ke—ke batla go bua sena le mororo, gore, “Mona ke nnete.” Fong mo motlheng oo jaaka go ntse jaanong, mme jaanong jaaka go ne go ntse ka nako eo, ba ne ba goeletsa, “Modimo o kae?”

¹⁹ Sentle, sone selo se, gore, ba tlogetse Modimo fa ba ne ba tlogela Lefoko la Gagwe. Leo ke lebaka le re nang le dilo ka tsela e re dirang ka yone gompieno, ke ka gore batho ba tlogetse Lefoko la Modimo.

²⁰ Fa ngaka e ne e kwala melawana ya tiriso ya melemo, taelo, mme wena o okeditse sengwe mo go yone, kgotsa o ntshitse dingwe mo go yone, o tlaa bolaya molwetse wa gago. Go jalo. O tshwanetse o e tshegetse fela ka tsela e e kwadilweng ka yone. Go na le tshitabotlhole e e lekaneng foo go fenya botlhole, botlhole jo bo lekaneng go bolaya mogare. Mme tšhefi e ntsi mo go yone ntle le tshitabotlhole e ne e tlaa bolaya molwetse; mme—mme tshitabotlhole e ntsi thata kwa ntengleng ga tšhefi, e ne e tlaa dira eng? Ga go tle go thusa molwetsi wa gago. Jalo he o tshwanetse o go tshole go nepagetse.

²¹ Mme eo ke tsela e Lefoko la Modimo le leng ka yone. Ke Taelo ya Modimo ya melemo. Ee, mokaulengwe. Ke Taelo ya Modimo ya melemo ko bathong ba Gagwe go fodisa bolwetsi bongwe le bongwe, bolwetse bongwe le bongwe. Boleo le ga senama, eng le eng se e ka nnang sone, gone gotlhe go kgotsofadiwa mo Lefokong la Modimo. Amen. Ke Lefoko la Modimo. Le ne le le jalo kwa tshimologong; Le ne le le jalo mo pakeng ya fa bogareng; Le jalo mo pakeng nngwe le nngwe; mme Le jalo mosong ono, fela go tshwana jaaka Le ne le ntse jalo nako e A neng a Le bua, ka gore ga Le kake la fapoga ka tlhaka e le nngwe, ka gore Lone ke Lefoko la Modimo.

²² Fong batho gompieno, ga e kgane ba goeletsa: “Metlha ya methollo e fetile. Ga go na selo se se jaaka phodiso ya Semodimo.” Gobaneng ba go dira? Ka gore ba tsere Lefoko la Modimo mme ba dira tumelo ya kereke ya bone e phuthelwe mo go yone, mme bone ba tlhakatlhakantse selo se se phoso. Mme ga ba na thata epe teng moo. Fa moengele, mobishopo, mobishopo mogolwane, kgotsa le fa e le eng se go ka nnang sone, a tla mme a fetola Lefoko le le lengwe, go tlaa fetola Taelo yotlhe ya melemo. A re nneng totatota le se Le se buileng. Se Modimo a se buileng, a re Le tlogeleng gone jalo.

²³ Dikereke di ile gompieno. Bone ba fapogetse mo phantshong ya tshakgalo golo gongwe, ba dira makgotla, ba dira makoko, ba tlisa batho go latela ditumelo tsa kereke mo boemong jwa go latela Keresete. Ga ke batle tumelo epe fa e se Keresete, molao ope fa e se lorato, le buka epe fa e se Baebele. Moo ke totatota se re nang naso: Moo ke Tumelo ya Modimo ya kereke, Ke Taelo ya Modimo ya melemo. Ke Tshitabotlhole ya Modimo ya boleo. Ke Tshitabotlhole ya Modimo ya phodiso ya rona, mme Yone ke—Yone ke thata ya Modimo e bonaditswe ko go rona, jaaka re tsaya Lefoko mo matshelong a rona.

²⁴ Jaanong, re fitlhela gore ba a fetola, ba a goeletsa, “Modimo wa ga Moshe o kae?” Lebaka le Moshe a neng a nna le Modimo le dilo e ne e le gore, Modimo o ne a latela ditaelo tsa ga Moshe tsa mere, Moshe o ne a latela Lefoko la Modimo. Tsela e Petoro, Jakobose, le Johane ba neng ba nepa sekota nako nngwe le nngwe, ka gore bona—bona ba ne ba latela Lefoko.

²⁵ Fano nako nngwe e e fetileng . . . Mongwe le mongwe o a itse ke rata go dira sekota, le go fula, le jalo jalo. Mme ke ne ke na le Model 70 Winchester e nnye. Ke ne ka ema kong, mme ke le fa dijarateng di le masome a matlhano, mo patlelong ya go fula sekota, ke ne ka fula marumo a le ferabobedi go feta mogare ga leroba le le lengwe, ke le fa dijarateng di le masome a matlhano. Mme le ne la fapoganyana, lerumo. O tshwanetse o tshwaratshwarane nalo le go siamisana le lone. Mme ke rata go dira seo, ka mohuta mongwe go siamisa ditshika tsa me. Mme leo le ne la fapoga. Ke ne ke sa kgone go le dira gore le tsepame mo teng. Ke ne ka akanya gore go e ne e tlhoka go gajwa ka mo teng.

²⁶ Ke ne ka e romela morago kwa go Winchester Company. Ba ne ba romela morago, mme ba re, "Ao, Mokaulengwe Branham, kgotsa, Rrê Branham," ba ne ba re, "fa... Winchester eo ke nngwe ya tse di botoka go gaisa thata." Ne ba re, "E tlaa kgobokantsha marumo mo intshing kwa dijarateng di le masome a matlhano, kwa dijarateng di le masome a mabedi le botlhano, ke raya moo, intshing kwa dijarateng di le masome a mabedi le botlhano." Ne ba re, "Moo ke mo go botoka go gaisa mo o ka bang wa go bona."

²⁷ Ke ne ke itse mo go farologaneng. Ke ne ke itse gore fa dijarateng di le masome a matlhano ke ne ka fulela mo teng dimapo di ferabobedi ka go tlhamalala ka yone. Jalo he ke ne ke itse gore moo go ne go le phoso. Jaanong, eo ke tsela... Mme ke ne ke sa kgone go ikhutsa go fitlhela ke ne ke e busitse. Jaanong, e tlaa dira selo se se tshwanang.

²⁸ Jaanong, ga ke mongwe wa batho bana ba ba ratang go itaya le go gasa marumo, "Kereke e bua jalo, jalo he mpe fela re go eme nokeng." Fa baapostolo, ka Lefoko la Modimo, ka ditaelo tsa Modimo, ka Mowa o o Boitshepo o o tshwanang o re nang nao, ba kokoteletse dimapo mo phodisong ya Semodimo, ko dithateng tsa Modimo, fa re tlaa ema le gone, re a itse gore go jalo foo, jalo he emang go fitlhela re tsepamisa mo teng, ke gotlhe, gonne re a itse go dirile nako nngwe.

²⁹ "Malatsi a metlholo a fetile," le "Jesu Keresete o tshwana maabane, gompieno, le ka bosaeng kae", go jang? Modimo yoo a ka nna jang yo o suleng e le yo o tsogileng gape, a bile a tshelela ruri? Re ka go dira jang go nne mo thutong ya kereke, fa Modimo a sena tumelo epe ya kereke?

³⁰ Modimo ke Motho. Modimo o agile mo teng ga Kereke ya Gagwe, mme lona lo Kereke ya Gagwe. Fa o tsetswe seša, mme o tladitswe ka Mowa o o Boitshepo, wena o Kereke ya Modimo. Modimo o nna mo go ya gago... Onna mo motlaaganeng le wena. Erile Modimo a ne a fologa, a dirwa nama a bo a aga mo gare ga rona, O ne a dira eng? O—O ne a ne a tsharolola tante ya Gagwe mo gare ga motho wa nama. O—O ne a tlosa popego ya Gagwe go tloga mo Modimong go ya mothong go fetoga gore a nne teng, gore motho a tle a fetoge a nne jaaka Ena. Ao, O ne a fetoga a nna nna, gore ka letlhogonolo la Gagwe ke tle ke fetoge ke nne Ena.

³¹ Ao, a selo se segolo. Ga re kitla re tlhalogany se e neng e le sone. Ga e kgane batho ba goa gompieno, "Modimo o kae?" Boelang ko Lefokong. Boelang ko tshimologong.

³² Ko tshimologong O ne a bolelela barutwana ba Gagwe a re, "Yang ko lefatsheng lotlhe, mme lo rereng Efangedi. Ditshupo tsena di tlaa latela bone ba ba dumelang." Moo e ne e le gone. Boelang ko Lefokong le le tshwanang leo mme Le tlaa ntsha selo se se tshwanang. Ba ne ba latela Lefoko leo, mme Lone le ne la tsepama mo teng la bo le kokotela dimapo. Lomapo lengwe le

lengwe, tsholofetso nngwe le nngwe e Modimo a e dirileng, e ne ya bonatswa.

³³ Fa re ka boela ko Lefokong le le tshwanang leo, Le tlaa kokotela dimapo tse di tshwanang, le dire metlholo e e tshwanang, le diragatse dilo tse di tshwanang, le dire botshelo jo bo tshwanang, le dire sebopiwa se se tshwanang, le tsose baswi, le fodise balwetsi, le kgarameletse ntle bodiabolo, go bona diponatshegelo, go porofeta. Ke Efangedi e e tshwanang e e kokotetseng dimapo ka nako ele, fa re ka boela ko go e e tshwanang.

³⁴ Jaaka, go busetsa tlhobolo mo seemong se se tshwanang se e neng e le sone kwa tshimologong, dithoromo tsotlhe di tswe mo go gone, go tlaa tsepamisa lerumo gone ka tlhamallo. Mme fa re ntshetsa dithoromo tsotlhe tsa tumologo kwa ntle ga rona, Lefoko la Modimo le tlaa tsepama totatota fela kwa le neng le le gone kwa tshimologong ya ntlha. Go ntse jalo totatota. Le tlaa tsepama nako nngwe le nngwe. Le go dirile nako nngwe; Le tlaa go dira gape. Lo sekä lwa kgotsafatswa ke tumelo ya kereke kgotsa sengwe. Nnang gone foo go fitlhela Lefoko le tsepama sekoteng.

³⁵ Go nkogopotsa ka nako e mma le rra, kgotsa, rraa yo e eseng wa Morena wa rona Jesu ka madi a neng a Mo isitse golo ko moletlong wa Pentekoste. Mme ba ne ba tsamaile loeto lwa malatsi a le mararo, mme—mme kgabagare ba ne ba palelwa ke go Mmona. Ba—ba ne ba sa kgone go Mmona.

³⁶ Eo ke tsela e kereke e tsamaileng ka yone jaanong. E tsamaile mo go fetang . . . e tsamaile go ka nna loeto lwa dingwaga di le dikete tse pedi, mme ba palelwa ke go Mmona. Gone ke mona. Go na le ditshupo gongwe le gongwe di bonala tsa go Tla ga Gagwe, mme ba re, “Modimo o kae? Modimo o kae? Ke eng se se diragetseng ka Ene?”

³⁷ A lo ne lwa lemoga? Marea le Josefa ba ne ba Mo senka mo gare ga ba losika lwa bone, fela ga ba a ka ba Mo fitlhela. Gompieno re boela go bona fa Mamethodisti ba na le Ena, Mabaptisti ba na le Ena, Mapresbitheriene, kgotsa Malutere. Nnyaya, rra, ga ba a ka ba Mo fitlhela. Le gompieno ga re tle go Mo fitlhela gompieno. Go sa kgathalesege gore ke gantsi go le kae ka fa re lekang go boela ko morago mme re tsosolosa nngwe ya makoko ao a kgale, a a suleng, ga re kitla re go dira.

³⁸ Ba ne ba Mo fitlhela kae? Kwa ba Mo tlogetseng teng. Haleluya! Lo akanya gore nna ke sebidikami se se boitshepo; ke a fopholetsa nna ke ena. O tlaa Mo fitlhela fela jaaka ba dirile: kwa ba Mo tlogetseng gone. Kwa ba Mo tlogetseng gone, ke kwa ba Mo fitlhetseng gone. Ke kwa kereke e tlaa Mo fitlhelang gone.

³⁹ Ba ne ba Mo tlogela kae? Kwa moletlong wa Pentekoste. Kereke e tlaa Mmona kae? Morago kwa moletlong wa Pentekoste, kwa ba Mo tlogetseng gone nako e ba neng ba kgeloga mo

thutong ya baapostolo le jalo jalo. Morago ko dipakeng tseo tsa pele morago koo, ba ne ba ikgogela kgakala le yone ba bo ba tlhama ditumelo tsa bone tsa kereke, mme ba simolola thuto ya Bonikolaite, ba bopa kereke ya Khatholike, ba rulaganya bodumedi jwa—jwa se se bidiwang bodumedi jwa Bokeresete. Mme go tloga foo ba ne ba rulaganya, mme ba senya dilo, ba bo ba tlisa Bakeresete botlhe ka mo ditumelong tsa kereke, le jalo jalo, mme ba e tswakantsha yotlhe go fitlhela e le fela kokoanyo e e tshwanang e A e boneng fa A ne a tla. Ke totatota.

⁴⁰ Morago kwa tshimologong kwa re Mo tlogetseng gone, fa A ne a le maatla, fa A ne a tsosa baswi, ebole a fodisa balwetse, mme a kgarameletsa ntle bodiabolo; moo ke gone kwa morago ko tshimologong, kwa re Mo tlogetseng teng.

⁴¹ Ba re, “O kae? A O na le Mamethodisti? A O na le Mabaptisti?” Kgotsa esita, “A Ena o na le Mapentekoste?” Nnyaya, rra. Boelang ko ga kwa tshimo—... eseng lekgotleng la Pentekoste, lekokong la Pentekoste, leo ke leina. Ke mang yo o ka rulaganyang Pentekoste? Mpoleleleng. Pentekoste ga se lekgotla. Pentekoste ke maitemogelo a modumedi mongwe le mongwe yo o batlang go a amogela. Morago ko maitemogelong, eseng morago ko lekgotleng, fela morago ko maitemogelong. Pentekoste ke maitemogelo.

⁴² Mpe ke lo boleleleng sengwe. Lo lebeleleng maungo a dikereke tsa Pentekoste di a ungwang gompieno, lo tlaa fitlhela gore tsone ga di a simolola go tloga tshimologong: ba ngangisana, ba tlhathharuana, ba šakgala, ba tshwelekanye, ba golela *sena*, le go golela *Sele*. Jesu ne a bua mo go Johane 14, kgotsa Johane 15, “Ke nna Mofine, lona lo dikala.” A go jalo?

⁴³ Jaanong, lona balemi, lona ba mo Texas, ba Louisiana, le eng le eng se lo ka tswang lo le sone fano, ope yo o nang le kelotlhoko mo tlhalogayong, yo o kileng a bona mofine o gola, a itse gore mofine ga o ungue maungo. Dikala tsa mofine ke se se ungwang, fela e amogela botshelo jwa yone go tswa mofineng. Jesu ke motswedie wa rona wa Botshelo. Ee, rra. Jaanong, re tlaa lemoga, fong, fa Jesu e le motswedie wa Botshelo jwa rona, go raya gore Ena ke Mofine wa nneta. Jone botshelo jo bo leng ka mo mofineng bo ka mo kaleng. Mme fa mofine oo o ntsha kala ya ntlha, mme kala eo e le, segopa sa mafine se tlhagelela mo go yone, fa e ka ba ya tlhoga kala e nngwe, e tlaa bo e le segopa sa mafine. E tlaa tlhoga kala e nngwe, e tlaa nna segopa sa mafine. Mme e tlaa bo e le mohuta o o tshwanang wa kala go ya kwa bokhutlong jwa mofine. Ao tlhe Modimo.

Jaanong ke tlhoka halofo ya me ya oura; ke gaufi le go goroga fa go yone. Amen.

⁴⁴ Nako nngwe le nngwe e mofine oo o tlhogang kala, e tlaa nna jaaka kala ya ntlha. Goreng? Ka gore botshelo jo bo leng mo mofineng bo tlaa ntsha mohuta o o tshwanang wa kala. Fa

setlhare sa ntlha sa mofine se ne sa tlisa mafine, se se latelang ga se tle go tlisa maphutse. Se se latelang ga se tle go tlisa leungo la maungo a a botsarara. Mme fong, morago ga sebaka, go tswelela kwa tlase jalo, ga go tle go go dira.

⁴⁵ Fa Mofine wa nnete o ntsha kala, mme fa... Jesu e le Kala mo go ya ntlha, kgotsa, Mofine. Mme kala ya ntlha e e ungwileng, ba ne ba kwala Buka ya Ditiro morago ga yone. A go ntse jalo? Kereke ya Pentekoste, kereke ya mmatota ya Pentekoste, mme e ne ya kwala Buka ya Ditiro, ka ditshupo le dikgakgamatsi di latela modumedi. Fa Mofine oo wa nnete wa nnete o ntsha kala e nngwe ya nnete, ba tlaa kwala buka ya Ditiro fa morago ga yone. Ee, rra.

⁴⁶ Fano mo Arizona e se bogologolo, ke ne ke lebile setlhare mo jarateng ya monna: setlhare sa maungo a a botšarara. Se ne se na le mehuta e e ferang bongwe ya maungo mo setlhareng se le sengwe. E ne e le sone. Nngwe le nngwe ya one e ne e le leungo le le farologaneng. E ne e le setlhare sa namune le go simologa, fela se ne se na le digaranata; se ne se na le—se ne se na le disurunamune; se ne se na le dipomelo; mohuta otthe o o farologaneng wa maungo a a botšarara. Goreng? Di ne di lometswe teng moo. Di ne di tshela go tswa mo botshelong jwa setlhare seo, fela di ne di sa kgone go tlisa sepe fa e se se di neng di le sone. Di ne di sa kgone go tlisa dinamune, ka gore tsone ke mofine o o lometsweng. Fela nako nngwe le nngwe fa setlhare seo se ne se ntsha kala ya nnete mo go sone, e ne e le setlhare sa namune, mme se ne se ungwa dinamune.

⁴⁷ Eo ke tsela gompieno. Re lometse dikala tsa Methodisti, Baptisti, Presbitheriene ka mo Mofineng wa nnete, mme di tshela go tswa mo maatleng a Sone. Fela ga go kgone go ungwa sepe fa e se ditumelo tsa kereke le lekoko. Fela fa Mofine oo o ka ba wa tlhoga kala e nngwe, e tlaa bo e le makoko a a kopaneng a dirisanya, a a nonotshiwang ke Mowa o o Boitshepo, fela totatota jaaka go ne go ntse ka Letsatsi la—la Pentekoste; morago kwa tshimologong. Amen.

Go botoka ke tlogele. Amen.

⁴⁸ Fa Mofine oo o ka be wa tlhoga kala e nngwe, e tlaa nna fela jaaka e ne e ntse ka gone kwa tshimologong. Re lomela mehuta yotlhe ya ditumelo tsa kereke ka mo go yone: tsa Baptisti, tsa Methodisti, tsa Pentekoste, tsa Presbitheriene, tsa Lutere, tsa Baptisti; mme tsone nngwe le nngwe e ungwa loungo lwa Baptisti, loungo lwa Methodisti, loungo lwa Pentekoste, le sengwe le sengwe se sele. Fela fa go boa, fa Mofine oo o ka ba wa ntsha kala e nngwe ya nnete, o tlaa ungwa leungo la Mowa o o Boitshepo. Amen. E tlaa...

Ba re, “Sentle, rona re Mamethodisti.”

“Go ne go se jalo go tswa tshimologong.”

“Re Mabaptisti.”

“Go ne go se jalo go tswa tshimologong.”

“Re Mapresbitheriene.”

“Go ne go se jalo go tswa tshimologong.”

“Ga re dumele mo go bueng ka diteme.”

“Go ne go se jalo go tswa tshimologong.”

“Ga re dumele mo phodisong ya Semodimo mo kerekeng ya rona.”

“Go ne go se jalo go tswa tshimologong.” Haleluya! Se re se tlhokang gompieno ke sengwe go boela kwa tshimologong gape, go boela kwa tshimologong. Aleluya!

Nako ya me e fedile. A re rape leng.

⁴⁹ Morena Jesu, ao, mma ke tshele go bona motlha o kereke e boelang morago ko tshimologong. Go dumelele, Morena. Tlatsa lefelo le lennye lena mosong ono. Tlotsa modisa phuthego yo monnye yona fano, Morena, le ba bangwe bana. Re neye ga kgalalelo ya Gago. Re neye ga lethhonganolo la Gago. Re neye bokopano fano, Morena.

⁵⁰ Mpe re lebale ka ga dilo tse dingwe mme re boeleng ko tshimologong, gonre re a itse gore Morena wa rona o bua mo dipelong tsa rona mosong ono, “Ntshetsang mafine ano a a lometsweng kgakala le foo. Ikgaoganyeng le tumologo. Boelang ko tshimologong. Ke kwa go neng go ntse jalo.” Mme, Morena, re batla sengwe le sengwe se nne jaaka go tswa tshimologong.

⁵¹ Morena, letlelala maitemogelo a rona, fa re ise re nne le one ka nako e go fitlhela mosong ono... Fa go na le mongwe yo o dutseng fano yo o iseng a nne le maitemogelo ao a Mowa wa kwa tshimologong, mme a sena Mowa o o tshwanang oo o neng wa tsholrelwa ko tshimologong, goreng re tshwanetse go tsaya seemedi? Goreng re tshwanetse re tseye sengwe se se bogogotlo? Goreng re tshwanetse go tsaya tumelo nngwe ya kereke e e feteletseng, e e tsididi, e e gwaletseng, e e itlhokomolosang, fa mawapi a Pentekoste a tletse ka selwana sa mmannete sa popota? Goreng re tsaya seemedi?

⁵² Morena, re letle re boele ko tshimologong, mme re go amogejaaka ba dirile kwa tshimologong, mme re nne le ditiro tse di tshwanang, ditshupo, dikgakgamatsotse di ungwang leungo le le tshwanang: lorato, boipelo, kagiso, boiphapaanyo, bomolemo, bopelonomi, bonolo, bopelotelele. Modimo go dumelele. Re utlwe, Rara, gonre re neela kereke e nnye ena le tsosoloso ena ko go Wena mo seatleng sa Gago, Ka Leina la Jesu Keresete. Amen.

Modimo a lo segofatse. Ke tlhoile go tshwanela go siana, fela ke morago ga lesome le motso jaanong. Ke tlaa lo bona bosigong jono. Ke a leboga . . .



DILO TSE DI NENG DI SE JALO GO TSWA TSHIMOLOGONG TSW61-0119M
(Things That Wasn't So From The Beginning)

Molaêtsa o ka Mokaulengwe William Marrion Branham, o nê wa rêmwa la ntlha ka Sekgowa mo mosong wa Labonê, Ferikgong 19, 1961, kwa American Legion Hall ko Beaumont, Texas, U.S.A., o tsérwe mô theiping ya makenete mme wa gatisiwa ka Sekgowa o sa khutswafadiwa. Phuthololô e ya Setswana e gatisitswê le go abiwa ke ba ga Voice Of God Recordings.

TSWANA

©2022 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Kitsisô ka tetlokhopi

Ditshiamelo tsotlhe di sireleditswe. Buka e e ka gatisiwa fa motšhineng wa go gatisa wa ka fa lelapêng gore e dirisiwe ka namana kgotsa gore e abêlanwe, go se tuêdisô epê, e le sedirisiwa sa go gasa Efangele ya Jesu Keresete. Buka e ga e ka ke e rekisiwe, e boelediwe ka bontsi, e baiwe fa webosaeteng, e bolokiwe mo mofuteng oo e ka tlhagisiwang gape ka one, e fetolêlwé go maleme a mangwe kgotsa e dirisiwe go kgobokanya madi kwa ntle ga tetla e e kwadilweng ya Voice Of God Recordings®.

Go ka bolêlêlwá go feta fa kgotsa go ka itse ka dilo tse dingwe tse di leng têng, tswêêtswêê, ikamanye le ba ga:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org